

REGINALDUS THOMAS FOSTER DIEM OBIIT

P. Reginaldus Foster (O.C.D.) die 25 m. Decembris morbo Coronato obivit. Quadraginta fere annos munere secretarii epistularum Latinarum in Civitate Vaticana functus est ubi prorsus omnia Ecclesiae Catholicae documenta in Latinum vertenda scienter et perite et ornate curabat, simul atque apud Pontificiam Universitatem studiorum Gregorianam inter primos edocuit necnon inde ab anno 1985 scholas aestivas Latinitatis magistris ac cultoribus destinatas in Urbe recitabat ad quas unde quaque orbis terrarum centeni auditores singulis annis ventitabant ut apud praceptorum apprime doctum stuperent. Praeter sescenta millia instrumentorum S. Sedis quae Latinitate donavit, alia quaedam opera exaravit, e quibus apud Latinitatis cultores omnes nunc innotescunt *Ossa Latinitatis Sola* (2016) et *Ossium Carnes Multae* (2021), symbolas complures in periodico *Latinitatis* edidit, exinde is praemiis honestatus atque brevi inter moderatores eiusdem periodici est numeratus et operam volumini, c.t. *Lexicon recentis Latinitatis* dedit. Cum ars Latine ex tempore loquendi silvesceret ac paene in desuetudinem venisset, is omnium mortalium erat cupidissimus ut homines ad vivum usum sermonis Latini excitarentur, quamobrem sessiones colloquendi tam anno academico quam aestivo tempore instituit, unde plurimi Latine loquentes suam facultatem Latine garriendi primum sunt adepti. Moribus et vestitu, facete dictis et docendi genere maxime inclaruit. Vestigiis monumentisque urbis Romae perlustrandis valde delectabatur, ideoque in locis antiquis celeberrimis cum discipulis suis saepe conspici poterat. Homines sua eruditione et caritate et mira modestia allectos ad suum litterarum Latinarum amorem studiumque mirabiliter adduxit ut ex omnium aetatum fontibus Latinis suos animos summa rerum suavitate pascerent. Lucem Reginaldus Foster Milvauchiae (C.F.A.S.) die 14 Novembris 1939, haud nobili loco natus aspexit; adulescentulus cum annum decimum tertium attigisset, alumnus sacrorum factus est, deinde decimo quinto vitae suae nomen ordini Carmelitarum dedit ac tandem ex more ad sacerdotium est provectus. Reginaldus illud Carmelitanum *zelo zelatus sum pro Domino* vere fateri poterit. Quo defuncto, fortunam reipublicae litterarum lugemus.

Sit terra levis Reginaldo;
requiescat in pace.

Patricius M. Owens